

re, hoc est, lacus statui potest in ipso torrente Arnon, sed à torrente longius semotum.

Undecimo; *Gerasam* in trans-Jordanina regione vicinam ponit Adrichomius mari Galilææ, seu stagno Genesareth, at ex *Josephi* Lib. III. Belli Judaic. Cap. 2. & *Ptolemæi* descriptionibus constat cum Philadelphiâ fuisse in terminis Orientalibus regionis trans-Jordaninæ juxta montem Galaad.

Duodecimò; *Vallis Salinarum* ab Adrichomio constituitur in tribu Juda; at mihi certum est, eam nec in tribu Juda, nec intra terræ promissæ fines esse statuendam; sed extra eam in Idumæa. Vide quæ in hanc rem à nobis dicuntur 2 Reg. VIII. v. 13.

Decimotertiò; *Vallem Raphaim* in tabula tribus Benjamin particulari uno fere milliario horario Hierosolyma distantem ponit, eandemque in tribu Benjamin, in tabula verò totius terræ promissæ chorographica quatuor facile milliariis horariis in tribu itidem Benjamin ab eadem urbe removet: neutrum rectè, cum ea urbi ferè ad Occidentem fuerit conjuncta, totaque in tribu Juda, utpotè ejus extremitas Borealis fuerit terminus tribus Judæ Aquilonaris; inde verò longo tractu eadem vallis procurreret ad Meridiem usque Bethlehem. Vide quæ de hac re diximus Jos. XV. v. 8. Judic. II. v. 1. vel quæ dicuntur 2 Reg. V. v. 18.

Decimo quartò; inter Philisthæorum satrapias hunc ordinem ipse constituit, progressum faciendo à Meridie in Septentrionem, ut prima sit Gaza, deinde Ascalon, Azotus, Accaron, Geth: at mihi partim Scripturam secuto Jos. XI. v. 3. partim auctores alios non paucos, qui ab Adrichomio dissentiunt, magis hic ordo placet, Gaza, Ascalon, Azotus, Geth, Accaron.

Decimo quintò; *Aphec* vel *Apheca* tribus Judæ Adrichomius constituit in deserto Ziph tribus Judæ: at ea meo judicio collocanda est in extremis versus Occidentem ejusdem tribus finibus, quandoquidem ea multo tempore occupata fuerit à Philisthæis, ibique exercitus sui lustrationem Philisthæi habuerint, 1 Reg. IV. v. 1. & Cap. XXIX. v. 1. de ea enim accipio ea, quæ illis locis habentur, quemadmodum ad ea loca explico.

Decimo sextò; *Bethsames* & *Cariathjarim* urbes fuisse vicinas colligitur è 1 Reg. VI. v. 21. idemque indicatur Jos. XV. v. 9, 10. at eas Adrichomius nimium à se invicem distans collocat. Rursum utraque in tribu Juda, ut distetè haberetur in Scriptura pluribus locis: utramque autem Adrichomius in tribu Dan reponit. Denique utraque in finibus tribus Judæ Aquilonaribus, & Cariathjarim in communibus terminis tribus Judæ & Benjamin, ut habetur Jos. XV. v. 9, 10. & Cap. XVIII. v. 14. quæ omnia nullo modo exprimit Adrichomii tabula.

Decimo septimò; *Socho*, *Azeca*, *Vallem Terebinthi*, *fines Domim*, seu *Aphesdomim* fuisse loca conjuncta, perspicuè colligitur è 1 Reg. XVII. v. 1, 2. at Adrichomius ea nimium disjungit. Rursum *Azeca* fuisse inter Eleutheropolim & Æliam habet Hieronymus in AZECA, quod nullo modo exprimit Adrichomius. Ex quo colligo nec Eleutheropolim ab eo rectè fuisse constitutam, præsertim cum & Maceda in octavo ab ea milliario contra solis ortum constitui debeat, ut habet Hieronymus in locis Hebraicis, quod fieri non potest, nisi & Eleutheropolis & Maceda alio statuantur loco. Deinde Ramatha tribus Ephraim fuisse, non procul Socho tribus Judæ, manifestè colligitur è 1 Reg. XIX. v. 22. cum è Socho quasi digito ostenderetur Ramatha. Ex quo & illud videtur confici, has duas tribus hac sui extrema parte fuisse

conjunctas, & tribum Ephraim sese inter tribum Benjamin & Dan insinuasse, ut ea parte tribum Judæ contingeret: quæ omnia nullo modo exprimit tabula Adrichomii, cum apud eum tribus Ephraim nulla sui parte contingat tribum Judæ, & Socho vel Sockot Judæ remotior ponatur à Ramatha & extremis finibus tribus Ephraim.

Decimo octavò; *Najoth*, quæ dicitur esse in Ramatha, hoc est, in suburbano loco urbis Ramathæ, Adrichomius ita in tribu Ephraim ab ea removet, ut duodecim milliariis ab ea distet.

Decimo nonò; *Maspba* locum orationis intra terminos tribus Benjamin collocat Adrichomius, Hieronymus in locis Hebraicis tribui Judæ adscribit: verius puto in utriusque tribus confinio, quandoquidem utrique tribui à Scriptura videatur adscribi, Jos. XV. v. 38. & Cap. XVIII. v. 26. quin & à tribus Judæ hominibus potius fuisse habitatam, eidemque tribui potius esse adscribendam non obscurè colligitur è Judic. XX. v. 1. ad quem locum vide quæ diximus, & Onomasticon nostrum in MASPHA.

Vigesimo; *Jericho* in tribu Benjamin nimis ab Adrichomio in tabula abducitur à finibus tribus Ephraim, eademque vicinior statuitur tribui Judæ, quam tribui Ephraim; cum tamen ea statuenda sit juxta fines tribus Ephraim, ut indicat Scripturæ locus Jos. XVI. v. 7. ubi fines tribus Ephraim perveniunt in Jericho, quod etiam fatetur Adrichomius in descriptione locorum tribus Benjamin, num. 81. ubi de Jericho agit, quam dicit communem esse limitem tribuum Ephraim & Benjamin, idemque patet ex iis, quæ idem Adrichomius, Brochardus, & Hieronymus in locis Hebraicis habent de GALGALA. Quibus adde Josephum, qui Lib. V. Belli Judaic. Cap. 4. asserit à Jordane in Jericho sexaginta fuisse stadia: at hæc sexaginta stadia ita digerit Josephus Lib. V. Antiq. Judaic. Cap. 1. ut dicat Israëlitas transgressos Jordanem, & in Galgala progressos quinquaginta processisse stadia, & in decimo ab Hierichunte stadio castrametatos fuisse. Erat igitur Galgala in recta via euntibus à Jordane in Jericho, quâ parte videlicet proximè distabat Jordanes, ubi & Israëlita Jordanem transgressi erant: quæ tamen omnia nullo modo exprimit tabula Adrichomii, in qua ex Jericho ad Jordanem recta via nullo modo transitur per Galgala, sed à recta via abest longius; immo prout exprimit Adrichomius, duplex est viæ spatium à Galgala in Jericho, quàm sit à Galgala ad Jordanem. Vide quæ & nos diximus Jos. IV. v. 19.

Vigesimo primò; *Clauthmon*, five locus flentium, quem Adrichomius Clautomon vocat, nec rectè ab eo ponitur in tribu Benjamin, juxta Galgala, & fines tribus Ephraim; cum locus ille potius statui debeat in tribu Juda juxta Hierosolymam ad Occidentem trans Vallem Raphaim. Vide quæ à nobis dicuntur Judic. Cap. 11.

Vigesimo secundò; *Bethel* urbs ab Adrichomio statuitur in tribu Benjamin, nec omnino in confinio tribus Ephraim; cum tamen juxta ea, quæ nos diximus Gen. XXVII. v. 19. potius statuenda sit in tribu Ephraim, in confinio tamen tribus Benjamin.

Vigesimo tertio; *Rama* ab Adrichomio in tribu Benjamin vicinior Hierosolymæ constituitur, & Australior quàm Gabaa; cum tamen è Judic. XIX. v. 13. perspicuè colligatur Rama fuisse remotiorem & Aquilonariorem ipsa Gabaa, cum è Bethlehem & Hierosolyma venientibus prius occurrat Gabaa, quàm Rama. Adde his Josephum, qui à Rama Hierosolymam majorem distantiam statuit, nempe sex milliaria Italico-